

DISCOURS D'AVIGNOUN

**proununcia lou 9 de Juliet de 1967
pèr la celebracioun dóu Centenàri de la Coupo**

LA COUPO DE POUËSÌO

Tau rescontre qu'aquest de iuei es carga d'ensignamen, e d'emoucioun. Prouvènço e Catalougno se retrobon dins Avignoun, dins nosto capitalo felibrenco, pèr ié counmemoura lou Centenàri de la Coupo.

Urous sian de trouba à nòsti coustat li sòci Catalan vengu nous afourti soun amista.

Aquéli sòci soun li porto-paraulo de tóuti aquéli qu'en terro catalano regardon vers Prouvènço coume vers uno sorre aliuenchado, car, coume lou dis lou Mèstre:

Prouvènço e Catalougno, ami, soun dos coumpagno, dos sorre qu'en risènt la lumiero enfantè!

Aquéli sòci soun lou simbèu de la Catalougno ativo, courajouso, en lucho emé de dificulta qu'es pas de crèire, à l'ouro d'aro, pèr counserva sa persounalita, sa lengo, sa civilisacioun. Urous sian de ié souveta la benvengudo.

Lou vène de dire, nosto Coupo es centenàri. Cènt an d'istòri an passa sus elo. En cènt an, quant d'evenimen de touto meno, quant de treboulige e de tremudamen dins tóuti li relarg de la poulitico, de la sciènci, de la teinico, de la mouralo, de l'estetico!

Quand regardan à rèire, lou tèms de Balaguer nous sèmblo s'enfounsa dins la niue. Li resoun que determinèron sa proumiero vengudo en Prouvènço e fuguèron à l'acoumençanço de si relacioun emé li felibre se nèblon un pau dins la memento. Pèr quant d'ome soun meme d'à-founs desóublidado?